

AKASHVANI(AIR)

RNU: KOLKATA

Bengali Text Bulletin

12-04-2026

Time: 7.50 PM

বিশেষ বিশেষ খবরঃ-

১) প্রবাদপ্রতিম সংগীতশিল্পী, আশা ভোঁসলে প্রয়াত। শেষকৃত্য আগামীকাল।

দাদাসাহেব ফালকে সহ বহু পুরস্কারে ভূষিত অনন্য কণ্ঠের অধিকারী শিল্পীর প্রয়াণে সংস্কৃতি জগতে শোকের ছায়া।

রাষ্ট্রপতি, উপ-রাষ্ট্রপতি, প্রধানমন্ত্রী, পশ্চিমবঙ্গের রাজ্যপাল, মুখ্যমন্ত্রীর শোক জ্ঞাপন।

২) রাজ্যে বিধানসভা নির্বাচনের ভোটের দিন এগিয়ে আসার সঙ্গে সঙ্গে বাড়ছে রাজনৈতিক দলের শীর্ষ নেতৃত্বের প্রচার সভা।

জলপাইগুড়ির কাওয়াখালিতে বিজেপি-র বরিষ্ঠ নেতা প্রধানমন্ত্রী নরেন্দ্র মোদী এক জনসভায় বাংলার মানুষকে তাঁর দলকে এবার এ রাজ্যে সুযোগ দেওয়ার আহ্বান জানিয়েছেন।

৩) পশ্চিম বর্ধমানের আসানসোলে এক জনসভায় তৃণমূল কংগ্রেস নেত্রী, মুখ্যমন্ত্রী মমতা ব্যানার্জী, বিজেপির সোনার বাংলা গড়ার প্রতিশ্রুতিকে তীব্র কটাক্ষ করেছেন। এ রাজ্যের পরিযায়ী শ্রমিকদের ওপর বিজেপি শাসিত রাজ্যে অত্যাচার করা হচ্ছে বলে তাঁর অভিযোগ।

৪) মালদার মোথাবাড়ি কাণ্ডে জিজ্ঞাসাবাদের জন্য আজ ওই কেন্দ্রের কংগ্রেস প্রার্থী সায়েম চৌধুরী সহ আরও একজনকে আটক করা হয়েছে।

৫) দক্ষিণবঙ্গে আগামী ৩-৪ দিন দিনের তাপমাত্রা ৩ থেকে ৪ ডিগ্রী বাড়ার সম্ভাবনা বলে আলিপুর আবহাওয়া দফতর জানিয়েছে।

oooooooooooooooooooooooooooo

চলে গেলেন প্রবাদপ্রতিম সংগীতশিল্পী, আশা ভোঁসলে । দক্ষিণ মুম্বাইয়ের একটি বেসরকারি হাসপাতালে আজ দুপুরে তিনি শেষ নিঃশ্বাস ত্যাগ করেন। বয়স হয়েছিল ৯২ বছর। বৃকে সংক্রমণের সমস্যা নিয়ে গত সন্ধ্যায় তাঁকে হাসপাতালে ভর্তি করা হয়েছিল। আগামীকাল বিকেল ৪ টেয় মুম্বাইয়ের শিবাজী পার্কে তাঁর শেষকৃত্য সম্পন্ন হবে। আটদশকেরও বেশী সময়জুড়ে বিস্তৃত সংগীতজীবনে বহুমুখী প্রতিভার অধিকারী আশা ভোঁসলে পেয়েছেন, দাদাসাহেব ফালকে, পদ্মবিভূষণ সহ দু-বার জাতীয় পুরস্কার। ১৯৯৭-এ প্রথম ভারতীয় গায়িকা হিসেবে তিনি গ্র্যামী অ্যাওয়ার্ডের জন্য মনোনীত হন। পেয়েছেন ৭ বার ফিল্ম ফেয়ার অ্যাওয়ার্ডও।

অনন্য কণ্ঠস্বরের অধিকারী এই গায়িকার প্রয়াণে সংস্কৃতি জগতে নেমে এসেছে শোকের ছায়া। মহান এই শিল্পীর প্রয়াণে আকাশবাণীর শ্রদ্ধার্ঘ্য।

(ভয়েসকাস্ট – অভিজিৎ)

বিশিষ্ট সঙ্গীত শিল্পী হৈমন্তী শুক্লা তাঁর স্মৃতিচারণে আশা ভোঁসলের গানের রেকর্ডিং-এ তাঁর এক অসাধারণ অভিজ্ঞতার কথা শোনালেন ।

(বাইট – হৈমন্তী শুক্লা)

রাষ্ট্রপতি দ্রৌপদী মুর্মু, উপরাষ্ট্রপতি সি পি রাধাকৃষ্ণন, প্রধানমন্ত্রী নরেন্দ্র মোদী, কেন্দ্রীয় স্বরাষ্ট্রমন্ত্রী অমিত শাহ, প্রতিরক্ষা মন্ত্রী রাজনাথ সিং, তথ্য ও সম্প্রচার মন্ত্রী অশ্বিনী বৈষ্ণব সহ কেন্দ্রীয় মন্ত্রিসভা সদস্যরা কিংবদন্তী সঙ্গীতশিল্পী আশা ভোঁসলের প্রয়াণে গভীর শোক প্রকাশ করেছেন।

দেশের বহু বিশিষ্ট ব্যক্তি আশা ভোঁসলের প্রয়াণে গভীর শোক জ্ঞাপন করেছেন। পশ্চিমবঙ্গের রাজ্যপাল আর এন রবি, মুখ্যমন্ত্রী মমতা ব্যানার্জী আশা ভোঁসলের প্রয়াণে গভীর শোক প্রকাশ করেছেন।

oooooooooooooooooooooooooooo

রাজ্যে বিধানসভা নির্বাচনের প্রথম দফার ভোটের দিন এগিয়ে আসার সঙ্গে সঙ্গে বাড়ছে বিভিন্ন রাজনৈতিক দলের শীর্ষ নেতৃত্বের প্রচার সভা। রাজ্যের নানা প্রান্তে জনসভা, রোডশো-তে অংশ নিচ্ছেন তাঁরা।

বর্ষীয়ান বিজেপি নেতা, প্রধানমন্ত্রী নরেন্দ্র মোদী আজ শিলিগুড়ির কাওয়াখালিতে এক জনসভায় তৃণমূল কংগ্রেস সরকারের তীব্র সমালোচনা করে বলেন, এই সরকার রাজ্যজুড়ে শুধুমাত্র ভয়ে পরিবেশ তৈরি করেছে। গত ১৫ বছরে শাসক দল ভোট ব্যাঙ্কের রাজনীতির জন্য দেশ বিরোধী শক্তিকে সমর্থন করেছে এবং এই তোষণের রাজনীতির কারণে শিক্ষা ক্ষেত্রে বিভাজন এনেছে, আদিবাসী এবং চা শ্রমিকদের উন্নয়নেও কোনরকম কাজ করেনি।

(বাইট - প্রধানমন্ত্রী)

তৃণমূল কংগ্রেস নেত্রী মুখ্যমন্ত্রী মমতা ব্যানার্জী আজ পূর্ব ও পশ্চিম বর্ধমানে জনসভা করেন।

বর্ধমানের খণ্ডঘোষে এক নির্বাচনী সভায় মমতা ব্যানার্জী বলেন, কৃষি নিয়ে মিথ্যা অপপ্রচার করছে বিজেপি। ৫৪ লক্ষ মেট্রিকটন ধান চাষিদের কাছ থেকে কিনে খাদ্যসার্থী প্রকল্পে দেওয়া হয় বলে তাঁর দাবি। বাংলার ক্ষমতা দখলতো দূরের কথা, দিল্লির ক্ষমতাও বিজেপি ধরে রাখতে পারবে না বলে তিনি স্পষ্ট জানান।

ছাতনায় অন্য এক নির্বাচনী সভায় তৃণমূল কংগ্রেস নেত্রী বলেন, এস আই আর-এর নামে বৈধ ভোটারদের নাম বাদ দেওয়া বিজেপি-র, বাংলায় কোন জায়গায় নেই।

পশ্চিম বর্ধমানের আসানসোলে এক সভায় তৃণমূল কংগ্রেস নেত্রী, বিজেপির সোনার বাংলা গড়ার প্রতিশ্রুতিকে তীব্র কটাক্ষ করে বলেন, বিজেপি শাসিত রাজ্যগুলিতে এরা রাজ্যের পরিযায়ী শ্রমিকদের ওপর অত্যাচার করা হচ্ছে কেন।

(বাইট - মমতা)

০০০০০০০০০০০০০০০০০০০০০০

এদিকে, সুভাষচন্দ্র বসুর দাতা শরদ বসুর প্রপৌত্র চন্দ্র বসু বিজেপি ছেড়ে আজ তৃণমূল কংগ্রেসে যোগ দিয়েছেন। তৃণমূল ভবনে আয়োজিত এক অনুষ্ঠানে তার হাতে পতাকা তুলে দেন দলের নেতা ব্রাত্য বসু ও সাংসদ কীর্তি আজাদ। উল্লেখ্য এর আগে এসআইআর এ শুনানির জন্য নোটিশ পাওয়ায় তিনি ফ্লোভ প্রকাশ করেছিলেন।

০০০০০০০০০০০০০০০০০০০০০০

উত্তরপ্রদেশের মুখ্যমন্ত্রী যোগী আদিত্যনাথ সোনামুখী বিধানসভার বিজেপি প্রার্থী দিবাকর ঘরামীর সমর্থনে পাত্রসায়র গরুর হাটতলা ময়দানে জনসভা করেন। সেই সভা থেকে ফেরার পথে বিজেপি কর্মীদের ওপর হামলার অভিযোগ ঘিরে সোনামুখীতে চরম উত্তেজনা সৃষ্টি হয়। অভিযোগ সভা শেষে বাড়ি ফেরার পথে ধানসিমলা মোড়ের কাছে বিজেপি কর্মীদের বাস লক্ষ্য করে পাথর ছোঁড়া হয়। ভাঙা কাঁচে বেশকিছু কর্মী আহত হয়েছেন বলে খবর। পরিস্থিতি নিয়ন্ত্রণে আনতে এলাকায় কেন্দ্রীয় বাহিনী মোতায়েন করা হয়েছে।

অন্যদিকে, কংগ্রেস নেতা, তথা লোকসভার বিরোধী দলনেতা রাহুল গান্ধী আগামী মঙ্গলবার ১৪-ই এপ্রিল, এ রাজ্যে নির্বাচনী প্রচারে আসছেন। ওই দিন তিনি তিনটি জনসভায় বক্তব্য রাখবেন। প্রথম জনসভা করবেন উত্তর দিনাজপুরের রায়গঞ্জ। পরে মালদার চাঁচলের কালামবাগান মাঠের জনসভায় তিনি বক্তব্য রাখবেন। বিকেলে তিনি মূর্শিদাবাদের সামশেরগঞ্জ একটি নির্বাচনী সভা করবেন বলে প্রদেশ কংগ্রেস সূত্রে জানা গেছে।

০০০০০০০০০০০০০০০০০০০০০০

মালদার মোথাবাড়ি কাণ্ডে জিজ্ঞাসাবাদের জন্য আজ ওই কেন্দ্রের কংগ্রেস প্রার্থী সায়েম চৌধুরীকে আটক করা হয়েছে। তার সঙ্গেই ধরা হয়েছে ছাত্র

পরিষদের কালিয়াচক দু নম্বর ব্লক সভাপতি আসিফ শেখ সহ আরও একজনকে। গত পয়লা এপ্রিল কালিয়াচক ২ নম্বর ব্লক দফতরে ৭ জন বিচারককে আটকে রেখে বিক্ষোভ এবং তাদের গাড়িতে হামলা চালানোর ঘটনায় দফায় দফায় এই জিজ্ঞাসাবাদ চলছে।

উল্লেখ্য, এই ঘটনায় আগেই গ্রেফতার হয়েছিল আই এস এফ প্রার্থী শাজাহান আলি কাদরি, আইনজীবী মোফাকেরুল ইসলাম সহ ৫০ জন।

০০০০০০০০০০০০০০০০০০০০০০

দক্ষিণবঙ্গে আগামী তিন চার দিন, দিনের তাপমাত্রা তিন থেকে চার ডিগ্রি পর্যন্ত বৃদ্ধি পেতে পারে। পশ্চিমের জেলাগুলিতে তাপমাত্রা আরো কিছুটা বাড়ার সম্ভাবনা বলে আলিপুর আবহাওয়া দপ্তরের বিজ্ঞানী ডঃ সৌরিশ বন্দোপাধ্যায় আকাশবাণীকে জানিয়েছেন। আগামী মঙ্গলবার স্থানীয়ভাবে ঝাড়গ্রাম, পশ্চিম মেদিনীপুর ও মুর্শিদাবাদ জেলায় বজ্রবিদ্যুৎ সহ মেঘের কারণে হালকা থেকে মাঝারি বৃষ্টি হওয়ার সম্ভাবনা রয়েছে।

০০০০০০০০০০০০০০০০০০০০০০

যুব ভারতী ক্রীড়াঙ্গনে আজ আইএসএল ফুটবলে মোহনবাগান সুপার জায়ান্ট, পাঞ্জাব এফ সি, র মুখোমুখি হয়েছে। একটু আগে পাওয়া খবরে জানা গেছে পাঞ্জাব এফ সি ১-০ গোলে এগিয়ে আছে।

০০০০০০০০০০০০০০০০০০০০০০

০০০০০০০০০০০০০০০০০০০০০০